

Date – 24/01/2026

Time - 7:30 -7:40 Hrs

AKASHVANI AIZAWL

HEADLINES (MORNING)

- 1. Gauhati High Court Judge leh Mizoram State Legal Services Authority Executive Chairman ni bawk Justice Nelson Sailo chuan nimin khan Champhai District Jail a tlawh .
- 2. Mizoram State Level Sub-Committee on Fire Prevention-in loneitute chu kumin March ni 15 hmaa lo hal vek turin a hriattir.
- 3. Prime Minister Narendra Modia chuan sawrkar department hrang hranga hna hmuhthar thalai mi sing 6 leh sang 1 chuangte hnenah vawiina Rozgar Mela hman turah appointment letter a hlan dawn
- 4. Prime Minister Narendra Modi chuan Pathianni chawhma dar 11 hian 'Mann Ki Baat' programme a hmang leh dawn.

<><><>

JUDGE VISIT

Gauhati High Court Judge leh Mizoram State Legal Services Authority (SLSA) Executive Chairman ni bawk Justice Nelson Sailo chuan nimin khan Champhai District Jail a tlawh a, jail tangte awmna ward a fang bawk a ni.

Pu Justice Nelson Sailo chuan thu sawiin Jail tangte chu Legal Services Authority, district leh state level-ah a awm a, chung chuan an tanpui thei reng a ni tih a sawi a. Thuawih taka awm tura fuihin, jail chu insiamthatna hun atana hmang turin a fuih.

Champhai District Jail hi November ni 29, 1990 khan hawn a ni a, tunah hian jail tang mipa 123 leh hmeichhia 31 an awm a, tunah hian SASCI sum hmangin ward thar sak belh a nih bakah a bang siam that mek a ni.

<><><>

CM

Chief Minister Pu Lalduhoman Chungtlang khuaa rubber chingtute huan nimin khan a tlawh a. An hmalaknate enpuin, Chief Minister Rubber Mission hmanga hmalak zui zelna tur a en bawk. Forest Minister Pu Lalthansangan Chief Minister hi a tawiawm a ni.

Chief Minister hian Tut lui thlengin Chungtlang rubber hmun hi a fang a, hmun remchang atangin W. Phaileng rubber hmun a thlir a. Chu mi hnuah Darkhuang zaua rubber huanah rubber chingtute nena inkawm khawmna an nei leh a ni.

He hunah hian Chief Minister chuan, Mizoramah ram Hectares 50,000 vela zauah rubber a chin theih niin an hria a, CM Rubber Mission hmang hian kum 5 chhunga Hectares 11,500 a zaua chin khah an tum dawn a ni, a ti a. A sawngbawl na khawl thar 100 leina an approve tawh a, kumin hnai huna hman theih hman an tum, tiin sorkar hmalakna tlangpui a sawi a. A ching tura thlanten theihtawp lo chhuah se, sorkar pawhin theihtawp a chhuah dawn a, he mission hmang hian rubber tharchhuak tam ramah Mizoram siam tum ni se a ti.

Minister Pu Lalthansanga chuan rubber chin hi kuminah nasa zawkinkan bei leh dawn a, he mission hi a hlawhchham thianga lo tih hi an ngaihda a ni, a ti. Mizoram cluster lian ber chu Chungtlang an ni mek a. An vannei chho zel dawn tih a chianga a, a huan neitute leh siam thar mekte pawh lo tang sauh sauh se a ti..

Chungtlang Rubber Producer Society President Pu Malsawmthanga sawi danin, CM Rubber Mission phase 2 hnuaiah Chungtlang, chhungkaw 105 chenna hian hectares 95 an hmu a, phase 2 atanga a dawng tam ber pathumna an ni a, tunah hian lo an vat chho mek a ni. CM Rubber Mission Phase 2 ah hian ram hectares 2575 a zauah rubber kung nuai sawm pakhat chuang phun a ni ang.

Chungtlangah hian kum sawm liam taah khan rubber chin tan a ni a, kum 75,000 vel an phun a, an dam kim vek lova. Kum 2024 atangin kung 30,000 vel an hnai tan a, khawl an indaih loh avangin an rubber zawng zawng hi an la hnai thei lo deuh nia sawi a ni a. Nikum 2025 chhung khan an khua hian rubber atangin cheng nuai 70 vel an lalut a ni.

Sorkar chuan an rubber huan kawng hi tun hnuaiah a siam thatsak a, concrete pavement-a siam zuina tur cheng nuai 50 a pe bawka a, hmun hrang hranga rubber chingtute tan khawl 100 lei turin hmalak mek a ni.

<><><>

YMA

YMA Kumpuan "RUIHHLO DO" chungchanga hmalak dan tur ah Central YMA buatsaihin Aizawl Khawpui chhunga Branch OB te nen nizan khan Dawrpui Multipurpose Hall ah Inrawnkhawmna hun hman ani.

Central YMA President Pu R. Lalngheta kaihhruai he inrawnkhawmna hun ah hian Branch YMA OB kalkhawmte atangin rawtna hrang hrang ngaihthlak a ni a, an thutlukna ang chuan Ruihhlo Do na atan Aizawl khawpui chhunga Branch 111 te Zone hrang hrang 10 ah inthen nise. Zone huamchhunga Branch te atangin Zone CADS Member tur mi 3 theuh ruatchhuah tur ni se, Zone thenfel leh Zone hruaitu ruat chu Central YMA hruaituten ruahmanna an siam ang a, Zone hrang hrang hmalak tan hun chu Central YMA in ruahmanna a Siam ang.

Pu R.Lalngheta chuan ruihhlo do kawngah Branch YMA te pheikhai rual taka kal a tul thu te, fimkhur tak leh huai taka kal a ngaih dawn thu te; ruihhlo a sumdawngte pawh pal an ngaih chuan pal a tul thu a sawi bawka.

He hunah hian kum 2025 YMA Inkhawmpui Lian Rorel zinga pakhat "YMA NIHPHUNG INHRILH THARNA HUN HMAN THIN NISE" tih bawhzui nan

YMA nihphung in hrilh tharna hun Central YMA Treasurer Pu. H. Duhkiman a hmang a ni.

He inrawnkhawmna ah hian Branch 111 atanga aiawh kalkhawm te, CEC Memberte leh Central YMA OB te an tel a ni.

<><><>

JHUMING

Mizoram State Level Sub-Committee on Fire Prevention-in loneitute chu kumin March ni 15 hmaa lo hal vek turin a hriattir.

State Level Sub-Committee on Fire Prevention Chairman, Environment, Forest and climate Change Minister ni bawk Pu Lalthansanga hova thukhawm chuan Fire Prevention Week chu February ni 9 atanga ni 13 chhung hman ni se, an ti a. Kumin Fire Prevention Week thupui atan “Nungchate chenna leh tui thianghlim min petu ramngaw kangmei lakah venghim rawh” tih an thlang a ni.

State Level Sub-Committee on Fire Prevention chuan, March ni 15 aia tlai lovah lo hal zawh ni se, an ti a. Lengpui leh a chhehvela lo hal turte chu tlai lama thlawhtheihna thlawkchhuak leh tum hnuhnung ber hnu lamah chauh hal tur a tih a ni a. Kum danga an tih thin danin, Fire Prevention Award sem leh ni se an ti bawk.

<><><>

EDUCATION REFORMS

Mizoram Education Reforms Committee (MERC) vawi 14-na nimin khan Education Minister leh MERC Chairman Dr Vanlalhlana kaihhruaiin an thukhawm a.

An thurel zingah School kal hun chhung atan January to December (calendar year) chu Pawl 1 atanga Pawl 10 inkar tan hman a ni ang a, Pawl 10 exam erawh chu a pangngaiin a kal ang a. He academic session thar hi 2027-2028 session atanga hman tan tura ruahman a ni.

School uniform chu School tinin zalenna neiin an duh an thlang thei ang a, School kai tan hun chu tuna hman lai mek hi hman chhunzawm a ni ang.

Hindi zirna tih hmasawmna atan hmalakna hmasaah zirtirtu thawk laite tana training changtlung tak buatsaih a ni ang a. Zirlaiten pawl hniam zawk atanga Hindi an thiam nal theihna atan ruahmanna siam niin, a kimchang chu hun remchang hmasa berah puan chhuah a ni ang.

Heng bakah hian MERC meeting chuan 2026 HSLC leh HSSLC board examination result buah top 10, subject topper leh division tar lan thin chu tih tawp a rel a. English Medium School-te tan 'mahni tawng hman ni' chu kar khatah ni khat siam ni se a ti a. A ni chu school-in an remchan ni ber an thlang thei ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

PARTY PR ON LENGPUI AREA

Sihphir leh Lengpui chhehvel ram lei chungchang sorkarin a hriatpui lova, DC levela tihfel ni anga sawi chu thudiklo a ni tih MNF leh Congress Party ten an sawi.

MNF Gen Hqr Adviser Rajya Sabha MP Pu K.Vanlalvenan ZPM MLA pakhatin, Sihphir leh Lengpui chhehvel ram lei chungchang sorkarin a hriatpui lova, DC levela tihfel anih thu a sawi chu thudiklo a ni a, Party office chu dawt sawina hmun tur a ni lova, thu belhchian dawlo hmanga mipui rilru hruaisualna hmun tur a ni heklo, a ti. Sihphir leh Lengpui airport chhehvel ram hmanhmawh taka lei nia sawi chungchangah India Defence ministry in mimal kut atangin ram a lei lova, Mizoram sorkar kut atangin IAF in ram a lei a ni zawk tih vawiin khan Mizo Hnam Run chhung inkhawmah a sawi.

MP chuan May ni 15, 2025 ah sorkarin heng ram Lengpui leh Sihphir amite hi arukin Award for Acquisition a chhuah vek niin a sawi a, chuvangin ZPM sorkar hian midang a puh thiango a, Lok Sabha MP nilai hi Parliament standing committee on Defence ah member anih avangin a hriat ve ngei tur niin a lang a. A hrelo anih chuan a lungawiloh hle a rinawm, a ti.

Sorkar hmalakna chu minister handwriting hmanga ziaak a ni ngai lova, sorkar officer te hminga ziaak a ni thin. Act 213 hmangin sorkarin ram a lei thin a, dan anga chanchinbua chhuah tur anih laiin ram neitu diktak ten an hreve silo chu thil mak a ni, a ti a. Thildiklo inphum a awm ngei tih leh dan bawhchhhatna a awm tih a chiang a. Thudik hailang turin theihtawp chhuah a tum thu leh a hre tur ten an hriat ngei theih nan auchhuahpui a tum tih a sawi a ni.

MPCC Sr Vice President Pu Lalnunmawia Chuaungo chuan Adviser to Chief Minister in MNF sawrkar laia tih fel vek a ni tawh a, DC level ah tih fel a ni a, an hriatpui lo tia a sawi chu CM leh sawrkar hotu lawk ten an hriatpui a, thudiklo a ni a ti. Dan bawhchhhatna tam tak a awm a, dan an palzut vek a ti bawk.

Pu Lalnunmawia chuan Lengpui Airport bula ram lei chungchangah hian MNF ho khan thil tenawm tak tih tumin hma an la a, sum vaibelchhe tam tak ei tumin thil an kalpui a. Mahse official a an kalpui thui hma in an sawrkar kha a tlak tak avangin an tifel hman ta lova.

ZPM an sawrkar a, February ni 21, 2025 khan Chief Minister Pu Lalduhoma hian compensation tam uchuak tak pek tumna a awm avangin Lengpui Airport bul ram inleina chu a titawp rih a, 'Abeyance' ah an dah tih a sawi a, mahse Abeyance ah

an dah tak tak lo nge ni, Henry-a te an che a, May ni 25, 2025 khan ram inleina tur notification an ti chhuak leh ta si a ni a ti.

He ram in leina ah hian Land Aquisition Process mumal taka kalpui a ni lova, mipui a nghawng dan tur, social impact tur pawh zirchian a ni lova, hmanhmawh taka kalpui a ni. July ni 24 ah khan ram inleina an tifel vek hman a, ram lak dan tur kal hmang anga kalpui a ni lova, dan pawh an bawhchhe vek a ni a ti.

<><><>

PM

Prime Minister Narendra Modia chuan sawrkar department hrang hranga hna hmuhtar thalai mi sing 6 leh sang 1 chuangte hnenah vawiin hian appointment letter a hlan dawn. Rozgar Mela vawi 18-naah hian Video conference hmangin Pu Modia hian hun a hmang dawn a. Ramchhung hmun 45 ah a rualin an lo chhim dawn a ni. Tun tum Rozgar Mela-a hna hmu thar te hi sawrkar laipuia Ministry of Home Affairs, Ministry of Health and Family Welfare, Department of Financial Services, leh Department of Higher Education leh department dangte an ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 129-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni baw k ang.

<><><>

UKRAINE, US & RUSSIA TALK

Ni hnih awh remna zawnga Ukraine, Russia leh US te inbiakna chu Abu Dhabi ah neih mek a ni. Ukranian President Volodymyr Zelensky chuan Ukraine, United States leh Russia te chu UAE ah an inbiak tur thu hi nimin khan a puang a. Kum 2022-a ram pahnih inkara innghirngghona a awm hnua a ruala ram pathumte hi an inbiak leh hmasak ber a ni a. Davos-a World Economic Forum-ah President Zelensky leh Donald Trump te an inkawm hnuah he inbiakna hi neih anih tur thu a puang a. Russian President Vladimir Putina pawhin US Special Presidential Envoy Steve Witkoff leh sumdawng Jared Kushner te Moscow khawpuiah a kawm baw k a ni,.

<><><>